

摘藻堂四庫全書薈要

史部

欽定四庫全書叢要

史部

御定月令輯要卷二十

詳校官編修臣繆晉



欽定四庫全書薈要卷七千五百八十九

史部

御定月令輯要卷二十

十二月令

天道



原易臨剛浸而長本義臨進而凌逼於物也二陽浸長以逼於陰故為臨十二月之卦也增周

易集解乾九二見龍在田干寶曰陽在九二十二月之時自臨來也

栗烈也原詩二之日栗烈疏二之日建丑之月也栗烈為寒氣季冬之月無風亦寒

日在婺女原禮季冬之月日在婺女集說女在子玄枵之次也

中星

原禮昏婁中旦氏中淮南子註婁西方白虎之宿氏東方蒼龍之宿

律中大呂

原禮律中大呂集說大呂丑律長八寸二百分四十三分寸之百四增漢書律歷志大呂呂

旅也言陰大旅助黃鍾宣氣而牙物也位於丑在十二月淮南子大呂之數七十六主十二月下生夷則白虎通十二月律謂之大呂何大大也呂者拒也言陽氣欲出陰不許也呂之為言拒者旅抑拒難之也許善心神崔頌歲次上章律諧大呂

日窮于次

原禮日窮于次疏日窮于次者謂去年季冬日次於丑枵從此以來每引移次他辰至此

月窮盡還次丑枵故云日窮于次

月窮于紀

原禮月窮于紀疏月窮于紀者紀猶會也去年季冬月與日相會於丑枵自此以來月與

日相會在於他辰至此月窮盡
還復會於玄枵故云月窮于紀

星回于天

原禮星回于天疏星回于天者謂二十八宿
隨天而行每日雖周天一匝早晚不同至於

此月復其故處與去年季冬
早晚相似故云星回于天

數終歲始

原禮數將幾終歲且更始疏幾近也以去年
季冬至今年季冬三百五十四日未滿三百

六十五日未得正終唯近於終故
云數將幾終此月既終歲且更始

日在北陸

增左傳日在北陸疏日
在北陸夏之十二月也

涂月

原爾雅十
二月為涂

招搖指丑

原淮南子季冬之月招搖指丑增晉書樂志
十二月之辰謂為丑丑者紐也言終始之際

以紐結
為名也

極寒

增易稽覽圖冬至
後三十日極寒

陰陽南還

增春秋繁露冬月盡而陰陽俱南還陽南還
出於寅陰南還入於戌此陰陽所始出地入

地之見
處也

物動用事

原說文丑紐也十二月萬物動用
事象手之形時加丑亦舉手時也

杪歲

增晉書桓彝傳論交霜雪
於杪歲晦風雨於將晨

剛柔始交

增周易集解屯剛柔始交而難生崔憬曰十
二月陽始浸長而交於陰故曰剛柔始交萬

物萌芽生於地中有
寒冰之難故言難

艮止

增周易集解艮以止之荀爽曰謂建丑之月消息畢止也

大禁月

增田家五行十二月謂之大禁月忽有一日稍暖即是大寒之候

季冬

原梁元帝纂要十二月曰季冬傳休奕詩季冬時慘烈猛寒不可勝

暮冬

原梁元帝纂要十二月曰暮冬杜甫詩高唐暮冬雪壯哉舊瘴無復似塵埃

暮歲

原梁元帝纂要十二月曰暮歲盧諲歲暮詩疊疊圓象運悠悠方儀廓忽忽歲云暮遊原采蕭霍

杪冬

原梁元帝纂要十二月曰杪冬除月暮節

窮冬

增杜甫詩窮冬急風水江山雲物昏

臘雪

增杜甫詩西齋對雪詩對酒閑齋晚開軒臘雪時花飄疑節候色淨潤簾幃

蕭子雲歲暮直廬賦

原日纏女度歲華云暮衡輕炭燥權重泉涸藏玄武於太陰蟄騰蛇

於高霧日臨圭而易落畧中杙而南
倭凝寒氣於廣庭洞曾陰於端廡

歐陽修漁家傲詞

增十二月嚴凝天地閉莫嫌臺榭無
花卉惟有酒能欺雪意增豪氣直教

耳熱笙
歌沸

節序

火星中

增周禮天官凌人斬冰註火星中大寒冰方盛
之時疏火星中謂十二月平旦火星中於十二

月小寒節大寒中
是冰方盛之時也

初臘

原史記秦紀惠文君十二年初臘正義十二月臘
日也秦惠文王始效中國為之故云初臘獵禽獸

以歲終祭先祖因立此日也風俗通臘者獵也言田獵取獸以祭祀其先祖也或曰臘者接也新故交接故大祭以報功也

嘉平

原史記秦始皇紀三十一年十二月更名臘曰嘉平茅盈內紀始皇三十一年九月庚子盈高祖父

濛字初成乃於華山之中乘雲駕龍白日升天先是其邑謠歌曰神仙得者茅初成駕龍上升入太清時下玄洲戲赤城繼世而往在我盈帝若學之臘嘉平始皇聞謠歌而問其故父老具對曰此仙人之謠勸帝求長生之術於是始皇欣然乃有尋仙之志因改臘曰嘉平

臘明日

增史記天官書臘明日人衆卒歲一會飲食發陽氣故曰初歲

小寒

原淮南子冬至加十五日斗指癸則小寒音比應鐘增三禮義宗小寒為節者亦形于大寒故謂之

小言時寒氣
猶未極也

大寒

原淮南子小寒加十五日斗指丑則大寒音比無射增三禮義宗大寒為中者上形于小寒故謂之

大十一月一陽爻初起至此始徹陰氣出地方盡寒氣併在上寒氣之逆極故謂大寒

蒼陽雲

增易通卦驗小寒合凍蒼陽雲出氐

墨陽雲

增易通卦驗大寒降雪黑陽雲出心

戌臘

原後漢書禮儀志季冬之月星迴歲終陰陽以交勞農大亨臘註漢氏以午祖以戌臘午南方故以

祖冬者歲之終物畢成故以戌臘增風俗通臘者所以迎刑送德也大寒至常恐陰勝故以戌日臘戌者溫氣也

瘦羊博士

原後漢書甄宇傳註建武中每臘詔書賜博士一羊羊有大小肥瘦時博士祭酒議欲殺

羊分肉又欲投鉤宇恥之因先自取其最瘦者由是不復有爭訟後召會問瘦羊博士所在京師因以號之

黃羊祀竈

原後漢書陰興傳初陰氏世奉管仲之祀謂為相君宣帝時陰子方者至孝有仁恩臘日

晨炊而竈神形見子方再拜受慶家有黃羊因以祀之自是以後暴至巨富田有七百餘頃與馬僕隸比於邦君故後常以臘日祀竈而薦黃羊焉

用漢祖臘

原後漢書陳寵傳寵曾祖父咸莽召以為掌寇大夫謝病不肯應父子相與歸鄉里閉門

不出入猶用漢家祖臘人問其故咸曰我先人豈知王氏臘乎

臘會

原後漢書鄭玄傳註玄年十一二隨母還家正臘會同列十數人皆美服盛飾語言閑通玄獨漠然

如不及毋私督數之乃曰此非我志不在所願也

三戌為臘

原說文冬至後三戌為臘祭百神增西漢叢語宋用漢臘蓋冬至後第三戌火墓日也

賜祀門戶直

增漢官儀臘賜大將軍三公錢各二十萬牛肉二百斤粳米二百斛特進侯十五萬卿十萬校尉五萬尚書三萬侍中將大夫各二萬千石六百石各七千虎賁羽林郎二人共三千以為祀門戶

直

臘

原風俗通韓子書山居谷汲者臘臘而買水楚俗常以十二月祭飲食也又曰嘗新始殺也食新曰

臘

稱臘別名

原獨斷四代稱臘之別名夏曰嘉平殷曰清祀周曰大蜡漢曰臘

五帝臘祖

原獨斷五帝臘祖之別名青帝以未臘卯祖赤帝以戌臘午祖白帝以丑臘酉祖黑帝以

辰臘子祖黃帝以辰臘戌祖魏臺訪議王者各以其行之盛祖以其終臘水始生於申盛於子終於辰故水行

之君以子祖辰臘火始生於寅盛於午終於戌故火行

之君以午祖戌臘木始生於亥盛於卯終於未故木行

之君以卯祖未臘金始生於巳盛於酉終於丑故金行

之君以酉祖丑臘土始生於未盛於戌終於辰故土行

之君以戌

祖辰臘

歲終大祭

原獨斷臘者歲終大祭縱吏民宴飲非迎氣故但送不迎

玄枵之次

增月令章句自須女二度至危十度謂之玄枵之次小寒大寒居之齊之分野

臘蜡同日

原玉燭寶典臘者祭先祖蜡者報百神同日異祭也長編建隆四年和峴言聖朝以臘前

七日蜡恐不應於禮請依
開元故事蜡臘同用戌日

小歲

原四民月令臘明日謂小歲進酒尊長修刺賀君
師徐爰家儀蜡本施祭故不賀其明為小歲賀稱

初歲福始
慶無不宜

節日取柴

原晉書范喬傳喬邑人臘夕盜斫其樹人有
告者喬陽不聞邑人愧而歸之喬往喻曰鄉

節日取柴欲與父母
相歡娛耳何以愧為

神農置臘

增物原神農
初置臘節

口脂

原唐書百官志中尚署臘日獻口脂酉陽雜俎臘
日賜北門學士口脂蠟脂或以碧鏤牙簫杜甫臘

日詩臘日常年暖尚遙今年臘日凍全消侵陵雪色還
萱草漏洩春光有柳條縱酒欲謀良夜醉還家初散紫

宸朝口脂面藥隨恩
澤翠管銀盃下九霄

伏獵侍郎

原唐書嚴挺之傳李林甫與張九齡同輔政
戶部侍郎蕭昊林甫所引不知書嘗與挺之

言稱烝嘗伏臘乃為伏獵挺之白九齡省
中而有伏獵侍郎乎乃出昊岐州刺史

滕六異二

原幽怪錄晉州刺史蕭至忠將以臘日出獵
前一日有樵者見禽獸百許祈于玄冥使者

使者令老廩祈於東谷嚴四嚴四曰若令滕六降雪異
二起風不復出矣天未明忽風雪大作刺史不復出

竊食祭先

原歲華紀麗矜竊食註韓卓字子助陳留人
臘日奴竊食祭先人卓義其心矜而免之

賜神藥

原歲華紀麗尹軌或賜於神藥註尹軌字公度
晉太康元年臘日過洛陽城西一家求宿主人

以明旦是臘意不容又以曾聞公度名因
為設酒至旦乃賜主人神藥一丸而去

脂花餠

原雲仙雜記洛陽人
家臘日造脂花餠

種麥豆

增種樹書臘日種
麥及豆來年必熟

萱草麪

增食譜張手義
家臘日萱草麪

獨立仙

增清異錄孟昶時每臘日內官各獻羅體圈金
花樹子梁守珍獻忘憂花縷金于花上曰獨立

仙

臘日校獵

增宋史禮志太宗常以臘日校獵諭從臣曰
臘日出狩以順時令緩轡從禽是非荒也回

幸講武臺張樂賜羣臣飲遼史禮志臘十二月辰
日前期一日詔司獵官選獵地其日皇帝皇后焚香拜
日畢設圍命獵夫張左右翼司獵官奏成列皇帝皇后
升輦多囉倫穆騰以酒二尊盤飧奉進北南院大王以下

進馬及衣皇帝降輿祭東畢乘馬入園中皇太子親王
率羣官進酒分兩翼而行皇帝始獲兔羣臣進酒上壽
各賜以酒至中食之次親王大臣各進所獲及酒訖賜
羣臣飲還宮應歷元年冬漢遣使來賀自是遂以為常
儀劉禹錫連州臘日觀莫徕獵西山詩海天殺氣薄蠻
軍少伍囂林紅葉盡變原黑草初燒圍合繁鉦息禽興
大旆搖張羅依道口嗾犬上山腰猜鷹慮奮迅驚鹿時
跼跳瘴雲四面起臘雪半空消箭頭餘鵠血鞍旁見雉
翹日暮還城邑
金笳發麗譙

賜貢使衣馬

增遼史太宗紀會同八年十二月戊辰臘賜諸國貢使衣馬

綽哈雅布

原遼史禮志臘辰日天子率北南臣僚並戎服戊夜坐朝作樂飲酒等第賜甲仗羊馬國

詔謂之綽

哈雅布

內椒井中

原養生要論十二月臘夜令人持椒卧井旁無與人言內椒井中除疫病

權德輿臘日龍沙會詩

增簾外寒江千里色林中罇酒七人期寧知臘日龍沙會却勝

重陽落

帽時

蘓軾臘日遊孤山訪惠勤惠思二僧詩

增天欲雪雲滿湖樓臺明滅山

有無水清石出魚可數林深無人鳥相呼臘日不歸對
妻孥名尋道人實自娛道人之居在何許寶雲山前路
盤紆孤山孤絕誰肯廬道人有道山不孤紙窗竹屋深
自暖擁褐坐睡依團蒲天寒路遠愁僕夫整駕催歸及
未晡出山迴望雲木合但見野鶻盤浮圖茲遊淡薄歡
有餘到家恍如夢遽遽作詩大急追亡逋清景一失後

難摹

楊萬里臘裏立春詩

增嫩日催青出凍菱小風吹白落
踈梅殘冬未放春交割早有黃蜂

紫蝶
來

日次

初一日

檀高里祠后土

增漢書武帝紀太初元年十二月檀高
里祠后土東臨勃海望祠蓬萊又郊祀

志十二月甲午朔上親禪高里祠后土臨
勃海將以望祀蓬萊之屬幾至殊庭焉

設會作樂

增北史西域傳波斯國尤重十二月一日其
日人庶以上各相命召設會作樂以極歡娛

玉華殿雪詩

增宋史禮志雍熙三年十二月一日大雨
雪帝喜御玉華殿召宰臣及近臣謂曰春

夏以來未嘗飲酒今得此嘉雪思與卿等同醉又出御製雪詩令侍臣屬和

進太平總類

增實錄太平興國八年十一月庚辰詔史館所修太平總類一千卷宜今日進三卷

朕當親覽焉自十二月一日為始宰相宋琪等言曰天寒景短日閱三卷恐聖躬疲倦上曰朕性喜讀書頗得其趣開卷有益豈徒然也因知好學者讀萬卷書非虛語耳

賜餐

增玉海淳化二年十二月丙寅朔上御文德殿羣臣入閣禮畢賜百官廊下餐

十二月一日夜南嶽夫人作與許長史

增靈谷秀瀾榮藏身栖巖京被

褐均袞龍帶索齊玉鳴形盤幽遼裏擲神太霞庭霄上有陸賢空中有真聲仰我曲晨飛案此綠軒軒下觀八度內俯歎風塵縈解脫遺波浪登此眇眇身擾競三津竭奔馳割爾齡

十二月一日夜南嶽夫人又吟寄許玉斧詩

增飛輪高晨臺控轡

元壘隅手携紫皇袂條忽八風驅玉華翼綠幃青裾扇翠裾冠軒煥崔魏珮玲帶月珠薄八風塵中塞鼻逃當塗鼻腥凋我氣百疴令心徂何不颺然起蕭蕭步太虛

楊慎十二月朔旦南郊扈從省牲詩

增天仗雲門外宵衣曉漏前蒼龍旂

影動朱鷺鼓聲傳星爛甘泉燭霜清泰時煙南郊新警蹕重覩孝皇年

初二日

降聖閣

增唐會要天寶七載十二月二日玄元皇帝降於朝元閣改為降聖閣

承天節

原宋史真宗紀乾德六年十二月二日生於開封府第至道三年八月庚子命以十二月二日

為承
天節

修官制

增王海元祐八年十二月二日乙巳左僕射呂
大防言乞倣唐六典置局修官制一書以為國

朝大典詔於秘書省置局令范祖禹
王欽臣編修宋匪躬晁補之檢討

白鶴橋

原句容縣志茅山形如已字亦名已山漢永元
間茅氏兄弟三人乘鶴至此今縣東三里有白

鶴橋大茅君以嘉平月
二日駕白鶴會羣仙處

初三日

賜綾袍

增唐會要貞元八年十二月
三日賜文武常參官綾袍

初四日

石鼎聯句

增韓愈石鼎聯句詩序元和七年十二月四日衡山道士軒轅彌明自衡下來舊與劉師

服進士衡湘中相識將過太白知師服在京夜抵其居宿有校書郎侯喜新有能詩聲夜與劉說詩彌明在其側貌極醜白鬚黑面長頸而高結喉中又作楚語喜視之若無人彌明忽軒衣張眉指鑪中石鼎謂喜曰子云能詩能與我賦此乎

上九朝通畧

增玉海淳熙十一年十二月四日知台州熊克上九朝通畧一百六十八卷一百冊

詔遷一官

白居易答崔賓客晦叔十二月四日見寄詩

增今歲日餘二十六

來歲年登六十二尚不能憂眼下身因何更算人間事居士忘筌默默坐先生枕麴昏昏睡早晚相從歸醉鄉

醉鄉去此
無多地

初五日

宴崇德殿

增宋史禮志景德二年十二月五日宴尚書省五品諸軍都指揮以上契丹使於崇德殿

時契丹初來賀承天節擇膳夫五人齎本國異味就尚食局造食詔賜膳夫衣服銀帶器帛

復置宗學

增玉海嘉定九年十二月五日始復置宗學改教授為博士又置諭改隸宗正寺於是宗

室疏遠者咸得就學

五豆粥

增澤州志十二月初五日稻黍果豆和煮為粥曰五豆粥

初六日

幸薦福寺

增唐詩紀事景龍二年十二月六日上幸薦福寺鄭愔詩先成宋之問後進鄭愔詩舊郎

三乘闢佳辰萬騎留蘭園奉葉偈芝蓋拂花樓國會人王法宮還天帝遊紫雲成寶界白水作禪流鴈塔昌基遠鸚林睿藻抽忻承大風曲竊預小童謳宋之問詩香刹中天起宸遊滿路輝乘龍太子去駕象法王歸殿飾金人影窓搖玉女扉稍迷新草木徧識舊庭闌水入禪心定雲從寶思飛欲知皇劫遠初拂六銖衣

初七日

宋哲宗生

原宋史哲宗紀熙寧九年十二月七日巳丑生於宮中赤光照室又禮志哲宗即位宰臣

請以十二月八日為興龍節哲宗本七日生以避僖祖忌故後一日

佛寧歲節

原宋史外國傳佛寧國以十二月七日為歲節地熱多風雨國人宴會鳴鼓吹笛擊鉦歌

樂舞為

張九成十二月初七日述懷詩

增謫居寂寞歲將闌几案凝塵酒盞乾落落雨

聲簷外過惜惜雪意座中寒

初八日

逐疫

增荆楚歲時記十二月八日為臘日諺言臘鼓鳴春草生村人並擊細腰鼓戴胡頭及作金剛力士

以逐疫

祭竈神

增荆楚歲時記十二月八日為臘日其日並以豚酒祭竈神注按禮器竈者老婦之祭尊於瓶

盛於盆言以瓶為罇盆盛饌也許慎五經異義云顓頊有子曰黎為祝融火正祝融為竈神姓蘇名吉利婦姓

王名
搏頰

法王料斗

增食譜張手美家
臘八法王料斗

浴蠶

原蠶書臘之日聚蠶種沃以牛溲浴於川毋傷其
藉廼縣之農政全書臘八日以桑柴灰或草灰淋

汁以蠶連浸焉一日而出繼以雪水浸之懸乾
或懸桑木之上以冒雨雪三宿而收之則耐養

臘八粥

原乾淳歲時記八日寺院及人家用胡桃松子
乳葷柿栗之類作粥謂之臘八粥帝京景物略

十二月八日人家效菴寺豆果
雜米為粥供而朝食曰臘八粥

浴佛

原事物紀原譬喻經云佛臘月八日降伏六師投
佛請死言佛以法水洗我心垢今我請僧洗浴以

除身穢仍為常緣則設浴之事西域舊俗也亦今臘月
灌佛之始增東京夢華錄十二月初八日街巷中有僧

尼三五人作隊念佛以銀銅紗羅或好盆器坐一金銅
或木佛像浸以香水楊枝洒浴排門教化諸大寺作浴
佛會

合臘藥增乾淳歲時記八日醫家多合藥劑侑以虎頭
丹八神屠蘇貯以絳囊饋遺大家謂之臘藥

王侯臘原瑣碎錄臘八
日名王侯臘

喜雪賦詩增玉海淳化三年十二月八日大雪數年來
涉冬無雪至是降及尺餘上喜賜近臣宴於

中書詔令盡醉上賦詩親以八分書遣中使就宴所賜
之是日又詔秘書監李至會三館學士宴於秘閣凡應

制賦詩者
二十五人

渾儀成增長編皇祐三年十二月八日司天夏官正李
用誨言重定渾儀鑄造已成欲乞依唐李淳風

一行舊制紀年月
以永將來從之

納冰增帝京景物畧十二月八日先期鑿冰方尺至日納冰窖中鑑深二丈冰以入則固之封如阜

浸豆米飼蠶增務本新書臘八日新水浸菜豆晒干又淘白米控乾以上二物收頓以備大眠起

用拌桑
葉飼蠶

孟浩然臘月八日於剡縣石城寺禮拜詩增石壁開金像香山倚鐵

園下生彌勒見回向一心歸竹柏禪庭古樓臺世界稀多嵐增氣色餘照發光輝講席遊談柄泉堂施浴衣願

承功德水從此濯塵機

虞集臘八日雪詩增僧粥曉分驚臘日獵圍晨出憶殘年白頭長與青山對華屋誰為翠黛

憐

初九日

慶善宮

增唐會要武德六年十二月九日以武功宮改為慶善宮

修蒲津橋

增唐會要開元九年十二月九日增修蒲津橋絙以竹葦引以鐵牛命兵部尚書張說刻

石為頌

觀御篆殿額

增玉海治平元年十二月九日召輔臣觀御篆孝嚴殿額於迎陽門遂御延和殿賜

茶

神光立雪

增傳燈錄神光聞達磨大士住止少林往彼日夕叅承師常端坐面牆莫聞誨勵其年十

二月九日夜天大雨雪光堅立不動遲明積雪過膝潛
取利刀自斷左臂置於師前師知是法器因與名曰
慧可

初十日

元化門校獵

增玉海建隆二年十二月
初十日出元化門校獵

進孝經解

增玉海紹興十年十二月十日
全一進孝經解命為太學職事程

方岳十二月十日詩

增酒醒開門雪滿山徑穿疎竹上
危欄溪山與我俱成畫草樹惟梅

大耐寒留伴夜深銀鑿落莫緣春近玉闌
珊老枝擎重供詩嚼一洗相如渴肺肝

十一日

暫乘車轎

增舊唐書張茂昭傳元和五年冬十二月十日以雪滑特許暫乘車轎不

得入宮門候路通依常

論法書

增玉海紹興七年十二月十一日諭輔臣曰劉光世喜書前日來乞朕所臨蘭亭叙亦以一本

賜之因論書法甚詳遂及法帖曰其間甚有可議如古帝王帖中有漢章帝千文千文是梁周興嗣所作何緣章帝書之舉此一事其他可知豈不悞後學者

十二日

特開延英

增舊唐書張茂昭傳元和五年冬十二月十日特開延英

殿對茂昭五刻乃罷

宣示琴阮

增玉海至道元年十二月十二日上以新增九絃琴五絃阮宣示近臣曰古樂之用與鄭

衛不同朕求古人之意有未盡者增琴為九絃曰君臣文武禮樂正民心為五絃阮曰金木水火土別造新譜凡三十七卷俾太常樂工肄習之

藏蠶子

增海寧縣志臘月十二日養蠶之家各以鹽酒茹灰薰揉蠶子藏之穀殼中至廿四日則出之

浴於川以待春至

百福日

原道經十二月十二日太素三元君朝真謂之百福日

十三日

建神御庫

增玉海康定元年十二月十三日判太常宋祁言太廟藏神御及公寶法物已滿夾室廟

壩狹不可更為藏室請於宗正寺
西偏別建神御庫命宗寺領之

十四日

拜逍遙公

增唐詩紀事景龍三年十二月十四日幸韋
嗣立莊拜嗣立逍遙公名其居曰清虛原幽

栖谷

置常平倉

增唐會要貞觀十三年十二月十四日壬午
詔於洛相幽徐齊并秦蒲等州置常平倉粟

藏九年米藏五年下濕之地粟
藏五年米藏三年皆著於令

閱馬射

增玉海咸平三年十二月十四日幸殿前指
揮使班院閱馬射遂宴射後苑上七中的

蘓軾十二月十四日夜微雪明日早往南谿小酌詩

增南

溪得雪真無價走馬來看及未消獨自披榛尋履跡最先犯曉過朱橋誰憐屋破眠無處坐覺村飢語不囂惟有暮鴉知客意驚飛十片落寒條

十五日

幸白鹿觀

增唐詩紀事景龍三年十二月十五日幸白鹿觀趙彥昭應制雲駉驅半景星蹕坐中天

國誕元宗聖家尋碧落仙玉杯鸞薦壽寶真鶴知年一睹光華旦忻承道德篇

占城祭天

原文獻通考占城國每歲十二月十五日城外縛木為塔王及人民各以衣物香藥置於

塔上焚之以祭天

上受釐頌

增玉海嘉祐四年十二月十五日磁州防禦使承亮上裕享受釐頌詔獎之

宋郊十二月望日禁中作

增閏歷先春破臘寒綵花金勝寵千官冰從太液池邊動

柳向靈和殿裏看瑞氣因風飄禁仗暖暉依日上仙盤須知聖運隨生殖萬國年年共此歡

十六日

天竺臘

原齊民要術天竺十二月十六日為臘臘麥熟

星回節

原玉谿編事南詔以十二月十六日為星回節其日遊於避風臺命清平官賦詩其國謂詞臣

為清平官

喜雪宴

增玉海嘉祐三年十二月十六日詔從臣觀河南所進芝草諭曰今日嘉雪大滋宿麥自勝芝

草瑞也是日賜喜雪宴於中書

進旁通冊

增玉海景德七年十二月十六日詔朝廷封椿錢物今尚書省歲終具旁通冊進入

祭厠姑

增吳郡志十二月十六日祭厠姑男子不得至

脫災迎福

增元史祭祀志每歲十二月十六日以後選日用白黑羊毛為線帝后及太子自頂至手

足皆用羊毛線纏擊之坐於寢殿蒙古巫覡念咒語奉銀槽貯火置米糠於其中沃以酥油以其烟熏帝之身斷所繫毛線納諸槽內又以紅帛長數寸帝手裂碎之唾之者三併投火中即解所服衣帽付巫覡謂之脫舊災迎新福云

孔武仲十二月十六日後殿朝謁詩

增晨光先到帝王別殿珠簾不上

鈎萬歲聲齊山獻壽九門朝退海分沅參差雉尾回丹陸杳遠鷄聲下禁樓年少曾來奏詞賦鈞天却記夢中

遊

十七日

玄武門侍射

增張說玄武門侍射詩序開元之初季冬其望天子始御北闕朝羽林軍禮修事厥

後二日乃命紫微黃門九卿六事與熊羆之將爪牙之臣合宴焉侑以純錦頒以珍器爾其射墉新成布侯既設檠仗林立惟軒霧布衆官半醉皇情載悅卷珠箔臨玉除唐弓在手夏箭斯發應弦命中屬羽連飛弧矢以來未之有也于時繁雲覆城大雪飛苑天人同澤上下交歡退食懷恩賦詩頌義凡若干篇詩射觀通元闕兵欄闕御筵雕弧月半上畫的暈重圓羿后神幽贊靈王法暗傳貫心精四返飲羽妙三聯雪鶴來銜箭星麟下集弦一逢軍宴洽萬慶武功宣

撰朝會二舞儀

增玉海元祐四年十二月十七日始命大樂正葉防撰朝會二舞儀式曰威加

海內之舞曰化成天下之舞威加海內舞為猛賁趨速之狀坐作進退之儀以成一變化成天下舞作三揖三辭三讓之儀以成一變儀式既具再命協律郎陳沂按閱節奏詳備自是朝會則用之

降金壇

原雲笈七籤太微玄清左夫人太微之上真人晉興寧三年乙丑十二月十七日與太玄真人

衆真降於句曲金壇真人楊羲之室吟北渚宮中歌詞曰鬱謁非真墟太玄為我館元功豈有壞縈蒙孤所難落鳳控紫霞矯轡登晨嶽寂寂無濠涯暉暉空中觀隱芝秀鳳丘逡巡瑤林畔龍胎嬰爾形八瓊迴素旦琅華繁玉宮結葩凌巖絮鵬扇絕億嶺拊翮扶霄翰西庭命長歌雲璈棄虛彈八風纏綠宇叢烟豁然散靈童擲流金火微啟辭案三元折腰舞紫皇揮袂讚朗朗扇景輝曄曄長庚煥超輶聳明月下眇使我悅顙哀地仙輩何

為棲
林間

十八日

請開五節堰

增唐會要武德八年十二月十八日水部郎中姜行本請於隴州開五節堰引水通

運許
之

注周易

增玉海至和元年十二月十八日宋咸上注周易十卷詔褒諭

夢得鶴雛

增湧幢小品黃熒莆田人正統庚寅母林氏夢虛空中紫衣人呼授以物舉衣承之得鶴

雛是歲臘月十有八日生公鑒形者謂之鶴相冠帶衣履書畫百物精緻度潔居宇絕一塵既老樂五松號五

松居士人謂得鶴之性

十九日

置律學

增唐會要律學顯慶元年十二月十九日于志寧奏置隸詳刑寺

蘓東坡生日

增年譜仁宗皇帝景祐三年丙子先生生於是年十二月十九日乙卯時原蘓軾詩

集元豐五年十二月十九日東坡生日也置酒赤壁磯下踞高峯俯鵲巢酒酣笛聲起於江上客有郭古二生頗知音謂坡曰笛聲有新意非俗工也使人問之則進士李委聞坡生日作新曲曰鶴南飛以獻呼之使前則青巾紫裘要笛而已既奏新曲又快作數弄嘹然有穿雲裂石之聲坐客皆引滿醉倒委袖出佳紙一幅曰吾無求於公得一絕句足矣坡笑而從之山頭孤鶴向南飛載我南遊到九疑下界何人也吹笛可憐時復犯龜茲

二十日

習儀注

增隋書禮儀志陳制先元會十日百官並習儀注令僕以下悉公服監之設庭燎街闕城上殿

前皆嚴兵百官各設部位而朝宮人皆於東堂隔綺疏而觀宮門既無籍外人但絳衣者亦得入觀

隨軍脩史

增唐會要開元八年十二月二十日詔張說修國史仍齎史本就并州隨軍修撰

蘓軾元豐四年十二月二十日詩

增聞說官家取乞聞將軍旗鼓捷如神故

知無定河邊柳得共中原雪絮春

二十一日

幸臨渭亭

增唐詩紀事景龍二年十二月二十一日幸臨渭亭李嶠等應制李嶠詩同雲接野烟飛

雪暗長天拂樹添梅色過樓助粉妍光含班
女扇韻入楚王絃六出迎仙藻千箱答瑞年

置算學

增唐會要算學貞觀二年十二月二十一日置

築會昌城

增唐會要天寶六載十二月二十一日壬戌築會昌城於湯所置百司及公卿邸第

御樓觀酺

增宋史禮志雍熙元年十二月二十一日御丹鳳樓觀酺召侍臣賜飲自樓前至朱雀門

張樂作山車旱船往來御道又集開封府諸縣及諸軍樂人列於御街音樂雜發觀者溢道縱士庶遊觀遷市肆百貨於道之左右召畿甸耆老列坐樓下賜之酒食

置應在司

增玉海淳化五年十二月二十一日初置諸州應在司具元管新收已支現在錢物申省

青苔

原續文獻通考段氏之先名儉魏者佐蒙氏有功六傳生思平有異兆國主楊于真忌捕之思平逃

匿飢摘野桃剖之核有文曰青昔思平拆之曰青乃十二月昔乃二十一日吾當以是日舉義遂借兵逐楊氏而有蒙國改國號曰大理

二十二日

太學生習射

增玉海乾道九年十二月二十二日臣寮

射文臣亦當與可討論典故以聞

藏闕

增遼史禮志藏闕儀至日北南臣寮常服入朝皇帝御天祥殿臣僚依位賜坐契丹南面漢人北面

分朋行闕或五或七籌賜膳入食畢皆起頃之復坐行闕如初晚賜茶三籌或五籌罷教坊承應若帝得闕臣僚進酒訖以次賜酒大康二年十二月二十二日始行是儀是日不御朝

甜羹潤筆

增李之儀跋古栢行後政和元年十二月二十日積雪初霽希韓德循携茶相期於天

寧圓若虛首座之天竺軒希韓出此紙見邀作字輒以是應之既終二君又作山藥芋頭蘿蔔晚菰號甜羹為

潤筆真一

段佳事

二十三日

編成陰陽書

增玉海元豐元年十二月二十三日提舉司天監被旨校定館閣及私家所藏陰陽

書置庫藏之編成七百十九卷上之

白居易十二月二十三日詩

增案頭歷日雖未盡向後唯殘六七行牀下酒瓶雖

不滿猶應醉得兩三場病身不許依年老拙宦虛教逐日忙聞健偷閑且勤飲一杯之外莫思量

二十四日

祀九宮貴神

增唐會要天寶三載十二月二十四日親祀九宮貴神於東郊

降聖節

增宋史禮志大中祥符元年以聖祖十月二十四日降延恩殿日為降聖節

種楊

增種樹書種水楊須先用木椿釘穴方入楊庶不損皮易長臘月二十四日種楊樹不生蟲

祭竈

原范成大村田樂府序臘月二十四夜祀竈其說謂竈神翌日朝天白一歲事故前期禱之詩古傳

臘月二十四竈君朝天欲言事雲車風馬小留連家有
盃盤豐典祀猪頭爛熟雙魚鮮豆沙甘鬆粉餌圓男兒
酌獻女兒避酌酒燒錢竈君喜婢子鬪爭君莫聞猫犬
觸穢君莫嗔送君醉飽登天門杓長杓短勿復云乞取
利市歸來分謝承舉送神辭赤烏墮城塵土昏人家火
急催宵殮庖夫膳吏遞走速涓塵擁篲當厨門張筵布

簀舉燈燭送神上天朝帝閣黃飴紅飴粢鋪案青芻菰
椒光堆盆空濛烟雲下車馬恍惚霧靄飄蘭蓀使者已
飽馬已飼我欲留神神不滯星旗雲轡去如風九萬天
衢片時至紺裘赤舄趨掖庭稽首帝前備陳事切須公
語毋隱容廸者降休逆者崇公廳紛紜爭務繁私家
細瑣猶多類一年一度送神行記得人間二十四
交年原乾淳歲時記二十四日謂之交年增熙朝樂事
十二月二十四日僧道作交年疏仙米湯以送檀

越

小節夜

增乾淳歲時記禁中以臘月二十四為小節夜

迎儺

增乾淳歲時記二十四日市井迎儺以鑼鼓遍至人家乞求利市

佩紙人

增同話錄紙錢起於唐時紙畫代人未知起於何時今世禱祀襍禮者用之刻板印染肖男女

之形而無口北方之俗歲暮則人畫一枚於臘月二十四日夜佩之於身除夕焚之

宣聖方

原本草綱目每臘月二十四日五更取第一汲井水浸乳香至元旦五更溫熱從小至大每人

以乳香一塊飲水三杯則一年無時災孔平仲云此乃宣聖之方孔氏七十餘代用之也

除殘

增嘉定縣志十二月二十四日掃屋塵名曰除殘

二十五日

老子度關

原初學記關令尹內傳曰周元極元年歲在癸丑冬十有二月二十五日老子度函谷關

令尹喜先勅門吏曰若有老翁從東來乘青牛薄板車勿聽過關其日果見老翁乘青牛車求度關授喜道德

經五
千言

自揀拜相日

增東觀奏記河東節度劉瑑在內署日上深器異大

中十年手詔追之既至拜戶部侍郎判度支十二月十七日次對上以御案歷日付瑑令於下旬擇一吉日瑑不諭旨上曰但揀一拜官日即

得奏二十五日佳上笑曰此日命卿為相秘世無知者高湜自集賢校理為鳳翔從事湜即瑑舊寮也二十四

日辭瑑於私第湜曰竊度旬時必副具瞻之望瑑笑曰來日具瞻何旬時也湜驚不敢發詰旦果爰立矣

夢中回文詩

增蘇軾記夢回文詩引十二月二十五日大雪始晴夢人以雪水烹小團茶使美人

歌以飲余夢中為作回文詩覺而記其一句云亂點餘花唾碧衫意用飛燕故事也

口數粥

原范成大村田樂府序二十五日煮赤豆作糜暮夜闔家同饗云能辟瘟氣雖遠出未歸者亦

留貯口分至襦襦小兒及僮僕皆預故名口數粥詩家臘月二十五浙米如珠和豆煮大杓轆鐺分口數疫

鬼聞香走無處鏤薑屑桂流蔗糖滑甘無比勝黃梁全
家團樂罷晚飯在遠行人亦留分襍中孩子強教嘗餘
波徧沾獲與臧新元叶氣調玉燭天行已過
來萬福物無疵癘年穀熟長向臘殘分豆粥

爆竹

原范成大村田樂府序爆竹他郡所同而吳中特
盛惡鬼蓋畏此聲古以歲朝而吳以二十五夜詩

歲朝爆竹傳自昔吳儂政用前五日食殘豆粥掃罷塵
截筒五尺煨以薪節間汗流火力透健僕取將仍疾走
兒童却立避其鋒當堦擊地雷霆吼一聲兩聲百鬼驚
三聲四聲鬼巢傾十聲百聲神道寧八方上下皆和平
却拾焦頭疊床底猶有餘威可驅癘
屏除藥裏添酒杯晝日嬉遊夜濃睡

相暖熱

原范成大村田樂府序爆竹之夕人家各又於
門首燃薪滿盆無貧富皆爾謂之相暖熱詩春

前五日初更後排門然火如晴晝大家薪乾勝豆蘆小
家帶葉燒生柴青烟滿城天半白棲鳥驚啼飛格磔兒

孫園坐犬雞忙鄰曲歡笑遙相望黃宮氣應纔兩月歲陰猶驕風栗烈將迎陽艷作好春政要火盆生暖熱

照田蠶

原范成大村田樂府序照田蠶與燒火盆同日

之杪以照田爛然遍野以祈絲穀詩鄉村臘月二十五長竿然炬照南畝近似雲開森列星遠如風起飄流螢今春雨電繭絲少秋日雷鳴稻堆小農家今夜火最明的知新歲田蠶好夜闌風焰西復東北占最吉餘難同不惟桑賤穀芄芄仍更芄麻無節菜無蟲

接玉皇

增帝京景物畧十二月廿五日五更焚香楮接玉皇曰玉皇下查人間也謝承舉迎神辭三十

六天高幾重珠宮貝闕金芙蓉清都上位玉帝子陞羅將輔排羣龍呼雷叱霆寶幢擁躡雲御氣金輿從魁罡赫赫豹駢下冰雪鋒矛隨萬馬赤脚巨門口吐虹披髮天蓬面塗赭八萬浮塵一霎過來察諸方不平者二十

五日年盡時帝
來人間人不知

蠶化粥

增東陽縣志廿五日以赤豆棗栗之類
和米煮之謂之蠶花粥云食之利養蠶

雲門一句

增傳燈錄問如何是雲門一
句文偃禪師曰臘月二十五

二十六日

坐蓬

增續文獻通考各官坐蓬節年各省官員俱
於十二月二十六日坐起至考察完日止

二十七日

夢書祭春牛文

增志林元豐六年十二月二十七日天
欲明夢數吏人持紙一幅其上題云請

祭春牛文予取筆疾書其上云三陽既至庶草將興爰
出土牛以戒農事衣被丹青之好本出泥塗成毀須臾

之間誰為喜愠吏微笑曰此兩句復當有怒者旁一吏云不妨此是喚醒他

張翥十二月二十七日雪寒奉旨賜宴史局詩

增聖旨恩榮六

賜筵玉音躬聽相臣宣史裁東觀何殊漢人在瀛洲總是仙御酒如春浮浩蕩宮花與雪鬪嬋娟微生此日沾休澤祇望丹宸祝萬年

二十八日

御殿讀春令

增唐會要乾元元年十二月二十八日丙寅立春御宣政殿命太常卿于休烈讀春

令

日戴氣

增玉海淳熙六年十二月二十八日日有戴氣太史奏君德至於天為萬民愛戴則有是瑞上

於是議蠲租

守歲合食

增乾淳起居注淳熙七年十二月二十八日南內遣御藥并後苑官管押進奉兩宮守歲

合食則劇金銀錢消夜歲軸果兒錦
歷鍾馗爆仗羔兒法酒春牛花朵等

范成大除夕前二日夜雨詩

增雪不成花夜雨來龍頭一洗定無埃小童却怕溪

橋滑明日先生合探梅

二十九日

龍見

增唐會要開元十八年十二月二十九日有龍見於池勅太常韋緇草祭儀緇奏祭用二月牲用少

牢樂用鼓鐘奏
姑洗歌南呂

預為元夕具

增宋史禮志政和五年十二月二十九日詔景龍門預為元夕之具實欲觀民風察

時態黼飾太平增光樂國非徒以遊豫為事特賜公師宰執以下宴

小除

增北京歲華記先除夕一日曰小除人家置酒宴往來交謁曰別歲焚香於戶外曰天香凡三日止

帖宜春字小

兒女寫好字

三十日

守歲

原風土記蜀之風俗除夕達旦不眠謂之守歲增東京夢華錄是夜禁中爆竹山呼聲聞於外士庶

之家圍爐團坐達旦不寐謂之守歲唐太宗守歲詩暮景斜芳殿年華麗綺宮寒辭去冬雪暝帶入春風階馥舒梅素盤花卷燭紅共歡新故歲迎送一宵中杜審言守歲侍宴應制詩季冬除夜接新年帝子王孫捧御筵

宮闕星河低拂樹殿廷燈燭上熏天彈絲奏管梅風入
對局探鉤柏酒傳欲向正元歌萬壽暫留歡賞寄春前
杜甫杜位宅守歲詩守歲阿戎家椒盤已頌花盞簪喧
櫪馬列炬散林鴉四十明朝過飛騰暮景斜誰能更拘
束爛醉是生涯蘇軾守歲詩欲知垂盡歲有似赴壑蛇
修鱗半已沒去意誰能遮况欲繫其尾雖勤知奈何兒
童彊不睡相守夜謹譚晨雞且勿唱更鼓畏添撾坐久
燈燼落起看北斗斜明年豈無年心事恐蹉跎努力盡
猶可誇
今夕少年

遣囚歸家

原華陽國志王長文試守江原令縣收得盜賊長文引見誘慰時適臘晦皆遣歸家獄先

有繫囚亦遣之謂曰教化不厚使汝等如此長吏之過
也蜡節慶賞宜就汝歸上下善相懽樂過節來還當為
思他理羣吏惶遽爭請不許尋有赦令無
不感恩所宥人輟不為惡曰不敢負王君

國奢

原唐書竇懷貞傳神龍中進左御史大夫會歲除中宗夜宴近臣謂曰聞卿喪妻今欲繼室可乎懷

貞唯唯俄而禁中寶扇障衛有衣翟衣出者已乃韋后乳媪王所謂莒國夫人者故璽婢也懷貞納之不辭世

謂媪婿為阿奢懷貞每謁見奏請輒自署皇后阿奢而人或謂為國奢

鍛磨齋

原雲仙雜記都下寺院每用歲除鍛磨是日作鍛磨齋

酒脯祭詩

原金門歲節賈島常以歲除取一年所得詩祭以酒脯曰勞吾精神以是補之

進儺

原秦中歲時記歲除日進儺皆作鬼神狀內二老兒儺公儺母增乾淳歲時記禁中臘月三十日呈

女童驅儺裝六丁六甲六神之類東京夢華錄至除日禁中呈大儺儀並用皇城親事官諸班直戴假面繡畫色衣執金鎗龍旗教坊使孟景初身品魁偉貫全副金鍍銅甲裝將軍用鎮殿將軍二人亦介冑裝門神教坊

南河炭醜惡魁肥裝判官又裝鍾馗小妹土地竈神之類共千餘人自禁中驅祟出南薰門外轉龍彎謂之埋祟而罷王建宮詞金吾除夜進攤名畫袴朱衣四隊行院院燒燈如白日沉香火底坐吹笙

除夕節

增物原巫咸始制除夕節

雞骨卜

原北戶錄南方逐除夜及將發船皆殺雞擇骨為卜傳古法也

醉司命

增輦下歲時記都人至年夜請僧道看經備酒果送神貼竈馬於竈上以酒糟抹於竈門之上

謂之醉司命

分歲

增范成大村田樂府序除夜祭其先竣事長幼聚飲祝頌而散謂之分歲詩質明奉祠今古同吳儂

用昏益土風禮成廢徹夜未艾飲福之餘即分歲地爐大煥蒼术香釘盤果餌如蜂房就中脆飴專節物四座

齒頰鏘冰霜小兒但喜新年至頭角長成添意氣老翁把盃心茫然增年翻是減吾年荆釵勸酒仍祝願但願尊前且強健君看今歲舊交親大有入無此盃分老翁飲罷笑掀鬚明朝重來醉屠蘇

賣癡獸

增范成大村田樂府序分歲罷小兒繞街呼叫云賣汝癡賣汝獸世傳吳人多獸故兒輩諱之

欲賈其餘詩除夕更闌人不睡厭襤毳滯迎新歲小兒呼叫走長街云有癡獸召人買二物於人誰獨無就中吳儂仍有餘巷南巷北賣不得相逢大笑相揶揄櫟翁塊坐重簾下獨要買添令問價兒云翁買不須錢奉賒癡獸千百年

大節夜

增乾淳歲時記禁中以臘月三十日為大節夜

消夜果

增乾淳歲時記禁中臘月三十日後苑修內司各進消夜果兒以大合簇釘凡百餘種如蜜煎

珍果下至花錫箕豆以至玉杯寶器珠翠花朵犀象博戲之具銷金斗葉諸色戲弄之物無不備具皆極小巧又于其上作玉輅高至三四尺悉以金玉等為飾護以貼金龍鳳羅罩以奇侈求勝

歲軸

增乾淳歲時記禁中臘月三十日后妃諸閭又各進歲軸兒及珠翠百事吉利市袋兒小樣金銀器

皿并隨年金錢一百二十文旋亦分賜親王貴邸宰臣巨璫

爆仗屏風

增乾淳歲時記禁中臘月三十日爆仗有為果子人物等類不一而殿司所進屏風外畫

鍾馗捕鬼之類而內藏藥線一熱連百餘不絕

迎送六神

增乾淳歲時記除夜比屋以五色錢紙酒果以迎送六神于門

聒廳

增乾淳歲時記除夜黃燭執盆紅映霄漢爆竹鼓吹之聲喧鬧徹夜謂之聒廳

天行帖兒

增乾淳歲時記除夜貼
天行帖兒財門子楮

照虛耗

原乾淳歲時記除夜明燈牀下謂之照虛耗輦
下歲時記都人至年夜於竈裏點燈謂之照虛

耗

呼長恩

增秘閣閑話司書鬼曰長恩除夕呼
其名而祭之氣不敢齒蠹魚不生

祭扁榜

增程史國學以古者五祀之義凡列齋扁榜至
除夕必相率祭之遂以為爐亭守歲之酌祝詞

惟祈速化而已羣儒執事者帽而不帶以緇代之謂之
叨冒爵中皆有數鴨脚每獻則以酒沃之謂之僥倖

題桃符

增茅亭客話蜀主每歲除日諸宮門
各給桃符一對俾題元亨利貞四字

贊祝火神

增遼史禮志歲除儀初夕勅使及伊勤希巴率
執事郎君至殿前以鹽及羊膏置爐中燎之

正及大巫以次贊祝火神訖
閣門使贊皇帝面火再拜

白堊畫門

增瑯嬛記五人國白玉城自女墻至城下俱以白玉為之鬼不敢入蓋鬼陰物喜黑而畏

白至今除夕人家用白堊統門
畫城池列干戈之類亦遺意也

鎔金卜

增瑯嬛記除夕梅妃與宮人戲鎔黃金散瀉入水中視巧拙以卜來年否泰梅妃一瀉得金鳳

一隻首尾足翅無不悉備

鏡卜

增熙朝樂事除夕更深人靜或有禱竈請方抱鏡出門窺聽市人無意之言以卜來歲休咎李鄴鏡

聽詞匣中取鏡辭竈王羅衣掩盡明月光昔時長著照顏色今夜潛將聽消息門前地黑人來稀無人錯道朝
夕歸更深弱體冷如鐵繡帶菱花懷裏熱
銅片銅片如有靈願得照見行人千里形

粃盆

原熙朝樂事除夕人家祀先及百神架松柴齊屋

景物畧除夕夜以松栢枝雜柴燎院中曰燒松盆烜歲

明

插芝蔴稽

增帝京景物畧十二月三十日插芝蔴稽于門簷牕臺曰藏鬼稽中不令出也

埋石鎮宅

原遵生八牋除日掘宅四角各埋一大石為鎮宅主灾異不起

接竈

增嘉定縣志除夕設饌于竈先熟大爐于門迎神而祭之名曰接竈

賽路神

增東陽縣志除夕具酒饌于門前設祭謂之賽路神

祀牀神

增海寧縣志除夕以酒果祀床神祈兒女安寢

舊年燈

增傳燈錄洪州高安縣建山澄禪師開堂有僧問故歲已去新歲到來還有不受歲者無師曰

作麼生僧曰恁麼即不受歲也師曰城上已吹新歲角窻前猶點舊年燈僧曰如何是舊年燈師曰臘月三十日

御製四十一年除夕書懷平生宵旰志七七又將過忘寢

愁暘雨精心勉泰和送寒辭故歲待曙問民疴莫論新
春媚預憐五噫歌

御製賦得爆竹聲中一歲除是日微雪爆竹連宵不夜城
占年積素即豐盈維新四始全仁政脩省三朝興太平

拂曙和風臨上日通晨淑氣擁華清願將栢葉芳尊酒
賜與臣憐共大羹

庾肩吾歲盡應令詩

增歲序已云殫春心不自安聊開栢葉酒試奠五辛盤金薄圓神燕

朱泥印鬼丸梅花應可折倩為雪中看

唐太宗除夜詩

原歲陰窮暮紀獻節啟新芳冬盡今宵促年開明日長冰銷出鏡水梅散入風

香對此歡終宴傾壺待曙光

張子容除日詩

增臘月今知晦流年此夕除拾樵供歲火帖牖作春書柳覺東風至花疑小雪

餘忽逢雙鯉贈言是上冰魚

王諲除夕詩

原今歲今宵盡明年明日催寒隨一夜去
春逐五更來氣色空中改容顏暗裏迴風

先人不覺已
著後園梅

王安石除夜立春詩

增猶殘一夜臘併見兩年春物以
終為始人從故得新迎陽朝剪綵

守歲夜傾銀思賜隨
嘉節無功祇自塵

蘇軾除夜過吳江詩

增東南勝處未忘情老去扁舟復
此行小邑歲除無市井下田水落

見農耕雪消西嶺嶒峻出春到平湖鱗甲
生橋下雙蛟耽睡美欲槌千鼓作雷鳴

政典

贊武功

原詩二之日其同載贊武功箋其同者君臣及
民因習兵俱出田也不用仲冬亦幽地晚寒也

取冰

原詩二之日鑿冰冲冲傳冰盛水腹則命取冰於山林冲冲鑿冰之意禮冰方盛水澤腹堅命取冰

集說冰之初凝惟水面而已至此則徹上下皆凝故云腹堅腹猶內也藏冰正在此時故命取冰冰入則陰事之終也周禮天官凌人掌冰正歲十有二月令斬冰三其凌疏正歲謂夏之建寅為正十有二月謂建丑之月冰堅腹厚之時令入山斬冰三其凌者凌謂冰室之中三倍納冰備消釋度故也增張彙觀藏冰詩寒氣方窮律陰精正結冰體堅風帶壯影素月臨凝冬賦凌人掌春期命婦昇鑿來壺色徹納處鏡光澄魯史曾留問邠詩舊見稱同觀里社享王道頌還興

居玄堂右个

原禮季冬之月天子居玄堂右个註玄堂右个北堂東偏

大難旁磔

原禮命有司大難旁磔註此難難陰氣也難陰始於此者陰氣右行此月之中日歷虛危

虛危有墳墓四司之氣為厲鬼將隨強陰出害人也疏
 旁磔者旁謂四方之門皆披磔其牲以禳除陰氣增後
 漢書禮儀志先臘一日大雩謂之逐疫其儀選中黃門
 子弟年十歲以上十二以下百二十人為佞子皆赤幘
 皂製執大鼗方相氏黃金四目蒙熊皮玄衣朱裳執戈
 揚盾十二獸有衣毛角中黃門行之冗從僕射將之以
 逐惡鬼於禁中夜漏上水朝臣會侍中尚書御史謁者
 虎賁羽林郎將執事皆赤幘陞衛乘輿御前殿黃門令
 奏曰佞子備請逐疫於是中黃門倡佞子和曰甲作食
 殤胈胃食虎雄伯食魅騰簡食不祥攬諸食咎伯奇食
 夢強梁祖明共食磔死寄生委隨食觀錯斷食巨窮奇
 騰根共食蠱凡使十二神追惡凶赫女軀拉女幹節解
 女肉抽女肺腸女不急去後者為糧因作方相與十二
 獸舞唯呼周徧前後省三過持炬火送疫出端門門外
 騶騎傳炬出宮司馬闕門門外五營騎士傳火棄雉水
 中百官官府各以木面獸能為儺人師訖設桃梗鬱偶

葦茭畢執事陞者罷葦戟桃杖以賜公卿將軍特侯諸侯云物原正咸始制驅儼張衡東京賦爾迺卒歲大儼毆除羣癘方相秉鉞巫覡操蒨振子萬童丹首玄製桃弧棘矢所發無臬飛礮雨散剛瘳必斃煌火馳而星流逐赤疫於四裔

土牛送寒

原禮出土牛以送寒氣註出猶作也送猶畢也增後漢書禮儀志是月也立土牛六頭於

國都郡縣城外丑地以送大寒註是月之昏建丑丑為牛寒將極是故出其物類形象以示送達之且以升陽也

畢祀

原禮乃畢山川之祀及帝之大臣天之神祇註四時之功成於冬孟月祭其宗至此可以祭其佐也

帝之大臣勾芒之屬天之神祇司中司命風師雨師

嘗魚薦廟

原禮是月也命漁師始漁天子親往乃嘗魚先薦寢廟註天子必親往視漁明漁非常事

重之也此時魚潔美增金火禮志天德二年命有司議薦新禮十二月羞以魚

豫備東作

原禮冰以入令告民出五種命農計耦耕事修耒耜具田器集說冰入之後大寒將退令

典農之官告民出其所藏五穀之種計度耦耕之書耦謂二人相耦也揉木為耒斲木為耜今之耜以鐵為之田器鉉基之屬凡治田所用者也此皆豫備東作之事陽事之始也

大合吹

原禮命樂師大合吹而罷註歲將終與族人大飲作樂於大寢以綴恩也

收薪柴

原禮乃命四監收秩薪柴以共郊廟及百祀之薪燎註四監主山林川澤之官也大者可析謂

之薪小者合束謂之柴薪施炊爨柴以給燎

專農民

原禮專而農民毋有所使註言專一女農民之心今之豫有志於耕稼之事不可徭役徭役之

則志散失業也

飭典論令

原禮天子乃與公卿大夫共飭國典論時令以待來歲之宜集說國典有常飭之以應來

歲之變時令有序論之以防來歲之差歲既更始故事亦有異宜者

賦犧牲

原禮乃命大史次諸侯之列賦之犧牲以共皇天上帝社稷之饗註此所與諸侯共之也列國

有大小也賦之犧牲大者出多小者出少饗獻也又乃命同姓之邦共寢廟之芻豢註此所以與同姓共也芻豢猶犧牲又命宰歷卿大夫至於庶民土田之數而賦犧牲以共山林名川之祀註此所與卿大夫庶民共者也歷猶次也卿大夫采地亦有大小其非采地以其邑之民多少賦之

制國用

原禮冢宰制國用必於歲之杪五穀皆入然後制國用

陳玉

原周禮春官天府季冬陳玉以貞來歲之嫩惡註問事之正曰貞問歲之美惡謂問於龜大卜職大

貞之屬陳玉陳禮神之玉

獻吉夢

原周禮春官占夢季冬聘王夢獻吉夢于王王拜而受之註聘問也夢者事之祥吉凶之占在

日月星辰季冬日窮于次月窮于紀星回于天數將幾終於是發幣而問焉若休慶之云爾因獻羣臣之吉夢於王歸美焉

計獄弊訟

原周禮秋官小司寇歲終則令羣士計獄弊訟登中於天府註上其所斷獄訟之數

為酒合族

增王居明堂禮季冬命國為酒以合三族君子說小人樂

考德正法

增家語古者天子常以季冬考德正法以觀治亂

納卯祿

原夏小正納卯祿傳卯祿也者本如卯者也納者何也納之君也

虞人入梁

原夏小正虞人入梁傳虞人官也梁者主設罟罟者也

商正

增逸周書其在商湯用師於夏除民之災順天革命改正朔變服殊號一文一質示不相從以建丑

之月為正

祭司寒

增左傳黑牡秬黍以享司寒註夏十二月日在虛危冰堅而藏之秬黑黍也司寒玄冥北方之神

故物皆用黑有事於冰故祭其神唐書百官志上林署季冬藏冰千段先立春三日納之冰井以黑牡秬黍

祭司寒

白瑞

增公羊傳王正月疏王者應以十二月為正則命以白瑞

助宣物

增國語元間大呂助宣物也註十二月曰大呂坤六四也元一也陰繫於陽以黃鍾為主故曰

元間大呂助陽宣散物也

遣吏上計

增史記范睢傳三歲不上計註凡郡長治民進賢勸功決訟檢姦常以歲盡遣吏上計

置廷尉平

增漢書宣帝紀地節三年十二月初置廷尉平四人秩六百石

官獄

原淮南子十二月官獄注十月歲盡刑斷故官獄也

稅加舊制

增後漢書光武帝紀建武六年十二月詔曰今軍士屯田糧儲差積其令郡國收見田租

三十稅一如舊制

選高才生

增後漢書章帝紀建初八年十二月詔曰五經剖判去聖彌遠章句遺辭乖疑難正恐先

師微言將遂廢絕非所以重稽古求道真也其令羣儒選高才生受學左氏穀梁春秋古文尚書毛詩以扶微

學廣異

義焉

立春不報囚

原後漢書章帝紀律十二月立春不以報囚註報猶論也立春陽氣至可以施生故

不論

囚

臨聽訟觀

增晉書武帝紀泰始四年十二月帝臨聽訟觀錄廷尉洛陽獄囚親平決焉

班五條詔書

增晉書武帝紀泰始四年十二月班五條詔書於郡國一曰正身二曰勤百姓三曰

撫孤寡四曰敦本息末五曰去人事

旌錄吳賢

增晉書元帝紀太興元年十二月癸巳詔曰漢高經大梁美無忌之賢齊師入魯修柳下

惠之墓其吳之高德名賢或未旌錄者具條列以聞

臨雍肄禮

增晉書禮志武帝泰始六年十二月帝臨辟雍行鄉飲酒之禮詔曰禮儀之廢久矣乃今

復講肄舊典賜太常絹百匹丞博士及學生牛酒

灑掃孔墓

增宋書文帝紀元嘉十九年十二月詔尼父德表生民功被百代而墳塋荒蕪荆棘弗剪

可蠲墓側數戶以掌洒掃魯郡上民孔景等五戶居近孔子墓側蠲其課役供給洒掃并種松柏六百株

奏新歷

增宋書百官志太史令一人丞一人掌三辰時日祥瑞妖災歲終則奏新歷

策試胄子

增梁書武帝紀天監九年十二月輿駕幸國子學策試胄子賜訓授之司各有差

立士林館

增南史梁武帝紀大同七年十二月於宮城西立士林館延集學者

年終放囚

增南史謝方明傳加晉陵太守復為驃騎長史南郡相嘗年終江陵縣獄囚事無輕重悉

放歸家使過正三日還到罪重者二十餘人網紀以下莫不疑懼時晉陵郡送故主簿弘季咸徐壽之並隨在為就死無恨至期有重罪一人醉不能歸鄉村責讓率領將送竟無逃者遠近歎服焉

衆文經

增北史魏道武帝紀天興四年冬十二月集博士儒生比衆經文字義類相從凡四萬餘字號

曰衆文經

求舜後

增北史魏孝文帝紀延興元年十二月詔求舜後獲東萊人媯苟之復其家畢世以彰盛德之

朽不

制陣法

增魏書高宗紀和平三年十二月乙卯制戰陣之法十有餘條因大儼耀兵有飛龍騰蛇魚麗

之變以示威武舊唐書職官志凡兵馬在府每歲季冬折衝都尉率五校之屬以教其軍陣戰鬪之法也具在教習簿籍

置諫院印

增舊唐書文宗紀太和九年十二月辛卯置諫院印諫院舊無印有章疏各於本司請印

人多知之至是特敕置印兼詔諫臣論事有關機密別以狀列之

蜡祭百神

增舊唐書禮儀志季冬寅日蜡祭百神於南郊大明夜明用犢二神農氏伊耆氏各用少

牢一后稷及五方十二次五官五方田畯五嶽四鎮四瀆以下方別各用少牢一當方不熟者則闕之

正齒位

增唐書禮樂志季冬之月正齒位則縣令為主

人鄉之老人年六十以上有德望者一人為賓
次一人為介又其次為三賓又其次為衆賓年六十者
三豆七十者四豆八十者五豆九十者及主人皆六豆
賓主燕飲則司正北面請賓坐賓主各就席立司正適
簋跪取觶興賓之進立於楹間北面乃揚觶而戒之以
忠孝之本賓主以下皆再拜司正跪奠觶再拜跪取觶
飲卒觶興賓主以下皆坐司正適簋跪奠觶興降復位
乃行無算爵其大抵皆如鄉飲酒禮

立石九經

增唐會要太和七年十二月敕於國子監講
論堂兩廊創立石九經并孝經論語爾雅共

一百五十九卷
字樣四十九卷

螭頭記言事

增唐會要太和九年十二月敕宜令起居
郎起居舍人準故事入閣日齋紙筆於螭

頭下記
言記事

定太學生額

增燕翼詒謀錄元豐二年十二月乙巳神宗命畢仲衍蔡京范鍾張璪詳定於太學

創八十齋三十人為額通計二千四百人內上舍生百人內舍生三百人外舍生二千人

賜臘藥

增乾淳歲時記臘月賜宰執親王三衙從官內侍省官并外閫前宰執等臘藥係和劑局方造

進及御藥院特旨製造銀合各一百兩以至五十兩三十兩各有差

文苑英華成

增宋會要太平興國七年帝以諸家文集其數至繁各擅所長榛蕪相間乃命翰林

學士承旨李昉閱前代文章撮其精要以類分之為十卷目錄五十卷雍熙三年十二月壬寅書成號曰文苑

英華

建糊名法

增玉海景德四年十二月禮部侍郎周起患貢舉不公因建糊名法

祈雪

增玉海天聖四年十二月壬午幸玉清昭應宮開寶寺景靈宮祈雪故事車駕還必作樂前導上精

意以禱命母作樂既雪輔臣皆賀上喜曰力田之民自今有望矣

獻皇極箴

增玉海治平元年十二月庚子知制誥祖無擇獻皇極箴英宗善其言詔褒荅之

資治通鑑成

增玉海元豐七年十二月戊辰資治通鑑書成二百九十四卷上起戰國下終五代

凡一千三百六十二年又畧舉事目年經國緯為目錄三十卷參考羣書評其同異俾歸一塗為考異三十卷合三百五十四卷詔書獎諭賜銀帛衣帶鞍馬上諭輔臣曰前代未嘗有此書過荀悅漢紀遠矣

封長白山

增金史禮志長白山大定十二年有司言長白山在興王之地禮合尊崇議封爵建廟宇

十二月禮部太常學士院奏奉敕旨
封興國靈應王即其山北地建廟宇

民用

衣褐卒歲

原詩無衣無褐何以卒歲疏言此二陽之月大寒之時無衣無褐不可終歲

擊莫除田

增國語及寒擊莫除田以待時耕註莫稟同寒謂季冬大寒之時也

迎新年

增荆楚歲時記歲暮家家具肴藪詣宿歲之位以迎新年相聚酣飲

餽歲

增風土記蜀之風俗晚歲相與餽問謂之餽歲蘇軾餽歲詩農功各已收歲事得相佐為歡恐無及

假物不論貨山川隨出產貧富稱小大寘盤巨鯉橫發
籠雙兔卧富人事華靡綵繡光翻座貧者愧不能微摯

出春磨官居故人少里巷佳節
過亦欲舉鄉風獨唱無人和

別歲

增風土記蜀之風俗晚歲酒食相邀為別歲蘓軾別歲詩故人適千里臨別尚遲遲人行猶可復歲

行那可追問歲安所之遠在天一涯已逐東流水赴海歸無時東鄰酒初熟西舍蟲亦肥且為一日歡慰此窮年悲勿嗟舊歲別行與新歲辭去去勿回顧還君老與衰

奧肉

增齊民要術作奧肉法先養宿豬令肥臘月中殺之擊訖以火燒之令黃用煖水梳洗之削刮令淨

割去五臟豬肪燭取脂肉齏方五六寸作令皮肉相兼著水令相淹漬於釜中燭之肉熟水氣盡更以向所燭肪膏煮肉大率脂二升酒三升鹽三升令脂渡沒肉緩水煮半日許乃佳漉出甕中餘膏仍瀉肉甕中令相淹漬食時水煮令熟而調和之如常肉法尤宜新韭新韭爛拌亦中炙噉其二歲豬肉未堅爛壞不任作也

苞肉

增齊民要術苞肉法十二月中殺豬經宿汁盡浥浥時割作棒炙形茅管中苞之無管茅稻稈亦得

用厚泥封勿令裂裂復上泥懸著屋外北陰中得至七八月如新殺肉

茗草

增齊民要術茗草色青黃紫華十二月稻下種之蔓延殷盛可以美田葉可食

魚醬

增齊民要術作魚醬法去鱗淨洗拭令乾如膾法披破縷切之去骨大率成魚一斗用黃衣三升白

鹽二斤乾薑二升橘皮一合和令調均內甕子中泥密封日曝熟以好酒解之作魚醬肉醬皆以十二月作之

則經夏

無蟲

雞頭合藥

原齊民要術十二月東門磔白雞頭可以合法藥

懸豬羊耳

增齊民要術懸臘月豬羊耳著堂梁上大富

甜肥脯

增齊民要術作甜肥脯法臘月取麋鹿肉片厚薄如手掌直陰乾下著鹽脆如凌雪也

五味脯

增齊民要術五味脯法臘月初作用鵝雁鷄鴨

及翠上脂瓶全浸勿四破別煮牛羊骨肉取汁浸豉和調一同五味脯法浸四五日嘗味徹便出置箔上陰乾

火炙熟槌亦名瘡腊亦名瘡魚腊

肥脯

增齊民要術作肥脯法臘月初作任為五味脯者皆中作唯魚不中耳白湯熟煮掠去浮沫欲去釜

時尤須急火急則易燥置箔上陰乾之甜脆殊常

培樹

增種樹書木自南而北多枯寒而不枯只於臘月去根傍土麥穰厚覆之燃火深培如故則不一二

年皆結實

斑皮竹笋

增北戶錄湘源縣十二月食斑皮竹笋諸笋無以及之

黑太陽

增清異錄黑太陽法出自韋邨公用精炭搗治作末研米煎粥搜和得所豫辦圓鐵範滿內炭

末

運鐵

鉞實擊五七十下出範陰乾盛寒爐

中熾數枚烘燃徹夜晉人獸炭豈此類耶

土栗

增山家清供芋名土芝小者煨乾入甕候寒月用稻草盪熟色香如栗名土栗雅宜山舍擁爐之夜

供

酒蟹

增蟹譜酒蟹須十二月間作於酒甕間撒清酒不得近糟和鹽浸蟹一宿却取出於罈中去其糞穢

重實椒鹽訖疊淨器中取前所浸鹽酒更入少新撒

者同煎一沸以別器盛之隔宿候冷傾蟹中須令滿

斫楮皮

增經世民事錄穀楮宜澗谷間種之三年可斫取皮以抄紙甚得濟用斫法十二月為上

迎陽種竹

增山家清事種竹法迎陽則取季冬順土氣則取雨時

老酒

增桂海酒志老酒以麥麴釀酒密封藏之可數年

計有貴客則設老酒冬鮮以示勤婚娶亦以老酒為

厚禮

本草綱目老酒臘月釀造者可經數十年不壞

冬舂米

原范成大冬舂行序臘日舂米為一歲計多聚

之冬舂米詩臘中儲蓄百事利第一先舂年計米羣呼

步碓滿門庭運杵成風雷動地篩勻箕健無粃糠百斛

只費三日忙齊頭圓潔箭子長隔籬耀日雪生光土倉

瓦龕分益藏不蠹不腐長新香去年薄收飯不足今年

頻頻炊白玉春耕有種夏有糧接到明年秋刈熟鄰叟

來看還歎嗟貧人一飽不可賒官租私債紛如麻有米

冬舂能

幾家

脰膾膾

增圖經本草脰膾獸舊說似狐長尾今滄州所

斑點醫家多用之異魚圖云試其臍於臘月衝風處置盂水浸之不凍者為真

兔腦催生

原本草綱目催生用臘月兔腦髓一箇攤紙上夾勻陰乾剪作符子於面上書生字一箇

候母痛極時用釵股夾定燈上燒灰煎丁香酒調下

治聾方

增原本草綱目治久聾臘月取鼠膽二枚熊膽一分水和旋取綠豆大滴耳中

狐目

增原本草綱目狐目治破傷風臘月收取狐目陰乾臨時用二目一副炭火微燒存性研末無灰酒服

之

臘雪水

原本草綱目臘雪密封陰處數十年亦不壞用水浸五穀種則耐旱不生蟲

食蒸餅

原瑣碎錄臘月晨起以蒸餅捲猪脂食之終歲不生瘡疥

造門日

原居家宜忌十二月癸丑日造門盜賊不能進

作蠶蓐

增務本新書臘月刈茅草作蠶蓐則宜蠶

梅花茶

原多能鄙事收梅花點茶法臘月梅將開時清旦摘半開花頭帶蒂置瓶內每一兩重用炒鹽

一兩灑之不可用手觸壞以厚紙數重密封置陰處次年取時先置蜜於盞內然後取花二三朵滾湯一泡茶

頭自開

香美

鯖魚膽

增居家必用治喉閉方鯖魚膽一枚臘月收入白礬末少許懸西北屋簷下陰乾為末備急用

蘆筒吹入咽喉立瘥

趙孟頫十二月耕詩

增一日不力作一日食不足慘淡歲云莫風雪入破屋老農氣力衰

偃倭腰背曲索綯民事急晝夜互相續飯牛欲牛肥艾
藁亦預蓄蹇驢雖劣弱挽車致百斛農事極勞苦歲豈
恒稔熟能知稼穡
艱天下自蒙福

趙孟頫十二月織詩

增忽忽歲將盡人事可稍休寒風
吹桑林日夕聲颼颼墻南地不凍

墾掘為坑溝砍桑埋其中明年芽早抽是月浴蠶種自
古相傳流蠶出易脫殼絲續亦倍收及時不努力知有
來歲不手凍不足
惜冀免號寒憂

物候

鴈北鄉

原禮鴈北鄉疏鴈北鄉有早有晚早者則此月
北鄉晚者二月乃北鄉集說鴈北鄉則順陽而

復也

鵲始巢

原禮鵲始巢疏鵲始巢者此據晚者若早者十一月始巢本草綱目鵲季冬始巢開戶背太歲

乙向太

雉雉雞乳

原禮雉雉雞乳集說雉火畜也感於陽而後有聲雞木畜也麗於陽而後有形

征鳥厲疾

原禮征鳥厲疾註征鳥題肩也齊人謂之擊征疏征鳥謂鷹隼之屬也謂為征鳥如征厲

嚴猛疾捷速也時殺氣盛極故鷹隼之屬取鳥捷疾嚴猛也

鳴弋

原夏小正十有二月鳴弋傳弋也者禽也先言鳴而後言弋者何也鳴而後知其弋也

隕麋角

原夏小正隕麋角傳益陽氣旦睹也故記之也

草芽白

增公羊傳王正月疏草物十二月萌芽始白

樹櫟

原淮南子其樹櫟註櫟可以為車轂木不出火惟櫟為然亦應陰氣也

山茶

增酉陽雜俎山茶葉似茶樹高者丈餘花大盈寸色如緋十二月開

楷木

增酉陽雜俎蜀楷木蜀中有木類柞衆木榮時枯柢隆冬方萌芽布陰蜀人呼為楷木

梅花使

增李之儀詞朱脣玉羽下蓬萊佳時近早梅自註朱脣玉羽湖湘間謂之倒挂子嶺南謂之梅

花使十二

月半方出

白符芝

增太平御覽仙人採芝圖白符芝高四五尺似梅常以大雪而華季冬而實

箭筍

增筍譜箭筍十二月生會稽以東諸山絕多或叢生或蔓延可如筋大長三四寸

側金盞花

增桂海花志側金盞花如小黃葵葉似槿歲暮開與梅同時

綠橘

增橘錄綠橘比他柑微小色紺碧可愛不待霜食之味已珍留之枝間色不盡變隆冬果之生意如

新

忍冬

原政和本草忍冬味甘溫主寒熱身種久服輕身長年益壽十二月采陰乾

木蘭皮

原本草綱目木蘭生零陵山谷及太山皮似桂而厚十二月采皮陰乾

蠟梅

增本草綱目蠟梅小樹叢枝尖葉凡三種以子種出不經接者臘月開小花而香淡名狗蠅梅經接

而花疎開時含口者名磬口梅花密而香濃色深黃如紫檀者名檀香梅

狼膏

增本草綱目狼膏臘月煉淨收之周禮獸人冬獻狼取其膏聚也

水槿

增農政全書水槿細葉小黃花又名水梔臘月斬其條而插之易成大木

場花

增臨江府志江西有一種小白花玉潔而幽香土人以為場花新喻縣東三十里有場岡多此花也

俗名水仙又名金盞銀臺殘冬始放

占驗

愆候

原禮季冬行秋令則白露早降介蟲為妖四鄙入保註戌之氣乘之也又行春令則胎夭多傷國多

固疾命之曰逆註辰之氣乘之也又行夏令則水潦敗國時雪不降冰凍消釋註未之氣乘之也

天皓

增史記天官書赤奮若歲歲陰在丑星居寅以十二月與尾箕晨出曰天皓黥然黑色甚明其失次

有應見參

除夜風占

增紀歷撮要除夜東北風五未大熟

冰占

增紀歷撮要冰結後水落主來年旱冰結後水漲名上水冰主水若緊厚來年大水

雪等伴

增田家五行十二月下雪而不消名曰等伴主再有雪久經日照而不消亦是來年多水之兆

赤豆粥

增田家雜占臘月二十五夜赤豆粥鑊滾則三年大發

火色占

原陶朱公書念四夜黃昏時候鄉人束稻草於竿點火在田間行走名曰照田蠶看火色卜水

旱色白主水色赤主旱猛烈年豐歲歉取北風為上又除夜燒盆爆竹與照田蠶看火色同是夜取安靜

為吉

臘前三白

原陶朱公書臘前得兩三番雪謂之臘前三白諺云若要麥見三白

立春占

原陶朱公書立春在殘年主冬暖諺云兩春合一冬無被暖烘烘

朔日占

原通考十二月朔日值大寒主有虎出為災值小寒主有祥瑞東風半日不止主六畜大災風

雨主
春旱

霧雨占

原陶朱公書臘月有霧露無水做酒醋通考月內有霧亦主來年有水有冷雨暴作主來年六

月七月
內橫水

北斗占

原通考常以歲除夜五更視北斗占五穀善惡其星所主明則成熟暗則有損貧狼主蕎麥巨

門主粟祿存主黍文昌主芝蔴蘆貞主麥
武曲主粳糯破軍主赤豆輔星主大豆

柳眼青

原雜占臘月柳眼青主來年夏秋米賤

雷占

原雜占臘月雷鳴雪裏主陰雨百
日又月內雷主來年旱澇愆期

雜紀

松栢貞茂

原荀子松栢經隆冬而不凋蒙霜雪而不變可謂得其貞矣增風俗通大寒既至霜雪既

降吾是以知松栢之茂也

靈鼓化蛇

增穆天子傳季冬甲戌天子東遊飲於留祈射於麗虎讀書於務丘闕獻酒於天子乃奏

廣樂天子遺其靈鼓乃化為黃蛇

赤光照室

原後漢書光武帝紀皇考南頓君初為濟陽令以建平元年十二月甲子夜生光武於縣

舍有赤光照室中欽異焉使卜者王長占之長辟左右曰此兆吉不可言

迎鼓

增後漢書東夷傳夫餘國以臘月祭天大會連日飲食歌舞名曰迎鼓是時斷刑獄解囚徒

十二月音

增白虎通匏之為言施也在十二月萬物始施而勞風俗通管漆竹長一尺六孔十二月

之音也物貫地而芽故謂之管

仲都忍寒

增桓譚新論元帝時漢中遇道人王仲都能忍寒乃於盛寒日令袒衣載以駟馬於昆明

池上遶水而走御者厚衣狐裘甚寒而仲都獨無憂也

大寒冰舟

增吳錄魏文帝至廣陵臨江觀兵兵有十餘萬旌旗彌數百里權嚴設固守時大寒冰舟

不得入江帝見波濤洶湧歎曰嗟乎固天所以隔南北也遂歸

叩凌得魚

增晉書王延壽延繼母卜氏嘗盛冬思生魚勅延求而不獲杖之流血延尋汾叩凌而哭

忽有一魚長五尺踊出水上延取以進母卜氏食之積日不盡於是心悟撫延如已生

禁水不冰

增抱朴子左慈以氣禁水
著中庭露之大寒不冰

藏彊

原荆楚歲時記歲前為藏彊之戲註按周處風土
記曰醇以告蜡竭恭敬於明祀乃有藏彊臘日之

後史嫗各隨其儕為藏彊分二曹以校勝負彊字藝經
庾闡作鈎字增庾闡藏鈎賦序予以臘後命中外以行
鈎為戲矣酉陽雜俎舊言藏鈎起於鈎弋蓋依辛氏三
秦記云漢武鈎弋夫人手拳時人效之日為藏鈎也衆
人分曹手藏物探取之又令藏鈎
剩一人則來往於兩朋謂之餓鵝

著襦煖

原世說韓康伯數歲家酷貧至大寒止得襦母
殷夫人自成之令康伯捉熨斗謂康伯曰且著

襦尋作複幘兒云已足不須複幘也母問其故答曰火
在熨斗中而柄熱今既著襦下亦當煖故不須耳母甚
異之知
為國器

穀門

增李尤穀城門銘穀門北中位
當於丑太陰主刑殺伐為首

辟寒香

增述異記辟寒香丹丹國所出漢武時入貢每
至大寒於室焚之暖氣翕然自外而入人皆減

衣

得著龜

增魏書靈徵志高祖延興元年十二月徐州竹
邑戍士邢德於彭城南一百二十里得著一株

四十九枝下掘得大龜獻之詔曰龜著與
經文相合所謂靈物也德可賜爵五等

獻蒼烏

增魏書靈徵志世宗景明二年十二月南青
州獻蒼烏君修行孝慈萬姓不好殺生則至

禁畜鷲鳥

增魏書釋老志延興三年十二月顯祖因田
鷹獲鴛鴦一其偶悲鳴上下不去帝乃惕然

問左右曰此飛鳴者為雌為雄左右對曰臣以為雌帝
曰何以知對曰陽性剛陰性柔以剛柔推之必是雌矣

帝乃慨然而歎曰雖人鳥事別至於資識性情竟何異哉於是下詔禁斷鷙鳥不得畜焉

跣行冰上

增北史李順興傳李順興年十餘乍愚乍智時莫識之其言未來事時有中者盛冬單布

衣跣行冰上及入洗浴畧不患寒

不服綿絮

增北史徐則傳則入天台山因絕粒養性所資惟松木而已雖隆冬沍寒不服綿絮

繫白象樹

增西陽雜俎乾陀國頭河岸有繫白象樹花葉似棗季冬方熟相傳此樹滅佛法亦滅

祝河得詔

增西陽雜俎李彥佐在滄景太和九年有詔召浮陽兵北渡黃河時冬十二月至濟南郡

使擊冰延舟冰觸舟舟覆詔失李公驚懼不寢食六日鬢髮暴白乃令津吏不得詔盡死吏懼且請公一祝沉浮於河吏憑公誠明以死索之李公乃令具爵酒言祝傳語詰河伯其旨曰明天子在上川瀆山岳祝史咸秩

予境之內祀未嘗匱爾河伯泊鱗之長當衛天子詔何
反溺之苟或不獲予齋告於天天將謫爾吏酹冰辭已
忽有聲如震河冰中斷可三十丈吏知李公精誠已
達乃沉鈎索之一鈎而出封角如舊惟篆印微濕耳

暖香

原雲仙雜記寶雲溪有僧舍盛冬若客至則
燃薪火暖香一炷滿室如春人歸更取餘燼

獻河清頌

增宋史真宗紀大中祥符三年十二月陝州
黃河再清庚戌集賢校理晏殊獻河清頌

嗔拳笑面

原事物紀原江淮之俗每作諸戲必先設
嗔拳笑面有諸行戲時嘗在故臘之末

觀書賜宴

增宋史禮志嘉祐七年十二月特召兩府近
臣三司副使臺諫官皇子宗室駙馬都尉管

軍臣僚至龍圖天章閣觀三聖御書及寶文閣為飛白
分賜下逮館閣官製觀書詩賜韓琦以下和進遂宴羣
玉殿傳詔學士王珪撰詩序刊日於閣數日再會天章
閣觀三朝瑞物復宴羣玉殿酒行上曰天下久無事今

日之樂與卿等共之宜盡醉勿復辭因召韓琦至御榻
前別賜一大卮出禁中名花金盤貯香藥令各持歸莫
不需醉至
暮而罷

賜貂裘帽

增宋史王全斌傳全斌之入蜀也適屬冬暮

帽以視事忽謂左右曰我被服若此體尚覺寒念西征
將衝犯霜雪何以堪處即解裘帽遣中黃門馳賜全斌
仍諭諸將以不徧及
也全斌拜賜感泣

碧金仙

增清異錄有刁蕭者攜一鏡色碧體瑩背有字
曰碧金僊大中元年十二月銅坊長老白九峯

造予以俸粒五石換之置
於文瑞堂呼為銅此君

蟄不脩葺

增厚德錄曹彬所居堂室樊壞子弟請加修
葺公曰時方大冬墻壁瓦石之間百蟲所蟄

不可傷其生其仁
心愛物蓋如此

打耗

增演繁露湖州土俗歲十二月人家多設鼓而亂
過之晝夜不停至來年正月半乃止問其所本無
能知者但相傳云此名打耗
打耗云者言驚去鬼祟也

太平御覽

增實錄太平興國八年十二月庚子太平總
類書成凡五十四門詔曰史館新纂太平總
類一千卷包括羣書指掌千古頗資乙夜之覽何止
名山之藏用錫嘉稱以傳來裔可改名太平御覽

大小寒

增程史韓平原在慶元初其弟仰胄為知閤門
事頗與密議時人謂之大小韓求捷徑者爭趨

之一日內燕優人有為衣冠到選者自叙履歷材藝應
得美官而留滯銓曹方徘徊浩歎又為日者獎帽持扇
過其旁遂邀使談庚申日者曰君命甚高但於五星局
中財帛宮若有所礙日下若欲亨達先見小寒更望成

事必見大寒可也優蓋以寒為韓侍燕者皆縮頸匿笑

太平瑞木

增玉海慶歷三年十二月澧州獻瑞木有文曰太平之道詔送史館劉敞作頌曰上天之

載今無臭無聲眷我聖德兮告以太平非筆非墨兮自然而成

書賜石湖字

增玉海淳熙十五年十二月辛卯書石湖二字賜范成大跋云天縱聖能游藝

超絕典則高古為伏羲畫體勢奇逸如神禹碑

萬魚燈

增遼史聖宗紀統和元年十二月甲辰是夕燃萬魚燈於雙溪

千齡節

增遼史聖宗紀統和元年十二月戊申千齡節祭日月禮畢百僚稱賀

大玉海

增元史世祖紀至元二年十二月己丑瀆山大玉海成勅置廣寒殿輟耕錄萬歲山在太液池

之陽廣寒殿在山頂中有小玉殿前架黑玉酒瓮一玉有白章隨其形刊為魚獸出沒於波濤之狀其大可貯酒三十餘石

射草狗

增元史祭祀志每歲十二月下旬擇日於西鎮

一雜色剪綵段為之腸胃選達官世家之貴重者交射之射至糜爛以羊酒祭之祭畢帝后及太子嬪妃併射者各解所服衣俾蒙古巫覡祝讚之祝讚畢遂以與之名曰脫災國俗謂之射草狗

辟蚤虱

原山居四要自入臘遇上水日勿令人見以少水灑薦席毯褥辟狗蚤壁虱

豬脂懸厠

原居家宜忌十二月取豬脂四兩懸於厠中入夏一家無蠅

揭蒲

增名勝志洋縣臘節以蒲藻蓋鵝公石上江渚寒魚皆依之太守泛舟張樂揭取名曰揭蒲

鐵笛亭

增名勝志隱屏峰在武彞五曲溪之北有羅侯洞洞背即鐵笛亭故址亭為李陶真人初真人

以宋熙豐間至武夷出祠牒乃唐開元時所給真人好吹鐵笛每遇節臘衆道人各於雲房招飲皆赴諸房笛聲同時並作一日別衆留詩云毛竹森森自剪裁試吹一曲下瑤臺當途不遇知音聽拂袖白雲歸去來遂吹鐵笛隱隱而去

得金像

增法苑珠林宋元嘉十五年羅順為平西府將戌十二月放鷹野澤見鷹雉俱落於時火燒野

草惟有三尺許叢草不然遂披而覓鳥乃得金菩薩坐像工製殊巧遂收而供之

御製靜坐讀書自喻

并序

朕在暢春園萬幾之暇季冬寒甚連日風雪靜坐讀

書自限文韻偶成二十韻自喻朕原本無學不過經書
成語堆集成句卿等皆老學素望朕所深知其中韻脚
不當平仄不和典故不穩聯句不雅者即速改正或成一
篇亦未可知

壯年好血氣
老少知聞顧
誤惟當謹銘
盤不至窘勵
精勉圖治
旰食盡民殷
性理宗濂洛
臨摹倣鵝羣
煌煌勞夢想
濟濟詠南薰
懸鍾是進德
止輦問停雲
懷保編氓
苦惠鮮鰥寡
煨留心刑服
念鄙笑圖書
焚優禮任舟

楫憑軒尊典墳前星誠琢磨帝子識羣分外戚無矜勢
諸王惜舊勲烽煙熄萬里瀚海畏三軍淮黃關國計漕
運致憂勤土木毋輕動民情宜所欣志廣則寬裕神清
息俗紛由來惡旨酒自喻喜玄纁長歌詠白雪論賦小
橫汾幾暇講寥廓提籌算紫氛乾陽得復轉測景考斜
曛有始無終歎為山一簣僅

晉十二月折楊柳歌

增天寒歲欲暮春秋及冬夏苦心
停欲度折楊柳沈亂枕席間纏綿

不覺
久

陶潛癸卯十二月中作與從弟敬遠詩

增寢跡衡門下邈與世相絕顧

盼莫誰知荆扉晝長閑淒淒歲暮風翳翳經夕雪傾耳
無希聲在目皓已潔勁氣侵襟袖簞瓢謝屢設蕭索空
宇中了無一可悅歷覽千載書時時見遺烈高操非所
攀謬得固窮節平津苟不由棲遲詎為拙寄意一言外
茲契誰能別

李嶠十二月奉教作

增玉燭年行盡銅史漏猶長池冷凝宵凍庭寒積曙霜蘭心未動色

梅館欲含芳裴回臨歲晚顧步佇春光

李賀十二月樂詞

增日脚淡光紅灑灑薄霜不銷桂枝下依稀和氣排冬嚴已就長日辭長

夜

謝良輔憶長安十二時

增憶長安臘月時溫泉彩仗新移瑞氣遙迎鳳輦日光先暖龍

池取酒蝦蟇陵下
家家守歲傳卮

白居易臘後歲前遇景詠意詩

增海梅半白柳微黃凍水初融日欲長度臘都

無苦霜霰迎春先有好風光郡中起晚聽衙鼓城上行慵倚女牆公事漸閑身且健使君殊未厭餘杭

朱子殘臘詩

增殘臘生春序愁霖逼歲昏小紅敷艷萼衆綠被陳根陰壑泉方注原田水欲渾農

家向東作百

事集柴門

御定月令輯要卷二十

謹案第三十八頁後三行率五校之屬刊本校訛
教據舊唐書改

第四十五頁前七行隕麋角引夏小正原文考此
條既見於十一月今又見於十二月今據傳崧
卿夏小正戴氏傳註蓋是衍文而麋之當為麋
則詳見

御製麋角解說謹識於此



謹案第七頁後八行多囉倫穆騰舊作敵烈麻都

今改三十頁前八行伊勒希巴舊作夷离畢

今改

欽定四庫全書





覆校官助教臣金學詩

校對官檢討臣王坦修

謄錄監生臣蔣維堅